

八  
代  
詩  
選

晉第一

八代詩選五

五言第三

長沙湘潭王闔運撰

張華

門有車馬客行

門有車馬客問君何鄉士捷步往相訊果是舊鄰里語昔  
有故悲論今無新喜清晨相訪慰日暮不能已詞端競未  
究忽唱分塗始前悲尙未弭後憂方復起

輕薄篇

末世多輕薄驕代好浮華志意旣放逸貨財亦豐奢被服  
極纖麗肴膳盡柔嘉童僕餘梁肉婢妾蹈綾羅文軒樹羽

蓋乘馬鳴玉珂橫簪刻玳瑁長鞭錯象牙足下金鑄履手  
中雙莫耶賓從煥絡繹侍御何芬葩朝與金張期暮宿許  
史家甲第面長街朱門赫嵯峨蒼梧竹葉清宜城九醞醑  
浮醪隨觴轉素蟻自跳波美女興齊趙妍唱出西巴一顧  
城國傾千金寧足多北里獻奇舞大陵奏名歌新聲踰激  
楚妙技絕陽阿玄鶴降浮雲鱗魚躍中河墨翟且停車展  
季猶咨嗟滄于前行酒雍門坐相和孟公結重關賓客不  
得蹉三雅來何遲耳熱眼中花盤案互交錯坐席咸誼譁  
簪珥咸墮落冠冕皆傾邪酣飲終日夜明燈繼朝霞絕纓  
尚不尤安能復顧他留連彌信宿此歡難可過人生若浮

寄年時忽蹉跎促促朝露期榮樂遽幾何念此腸中悲涕  
下自滂沱但畏執法吏禮防且切磋

博陵王宮俠曲二首

俠客樂幽險築室窮山陰燎獵野獸稀施網川無禽歲暮  
饑寒至慷慨頓足吟窮令壯士激安能懷苦心干將坐自  
口繁弱控餘音耕佃窮淵陂種粟著劍鐔收秋狹路間一  
擊重千金棲遲熊羆穴容與虎豹林身在法令外縱逸常  
不禁

雄兒任氣俠聲蓋少年場借友行報怨殺人租市旁吳刀  
鳴手中利劍嚴秋霜腰閒又素戟手持白頭鑲騰超如激

八代詩選 晉一  
電迴旋如流光奮擊當手決交屍自縱橫寧爲殤鬼雄義  
不入圍牆生從命子游死聞俠骨香身沒心不懲勇氣加  
四方

游獵篇

歲暮凝霜結堅冰洹幽泉厲風蕩原隰浮雲蔽昊天玄雲  
晻晻合素雪紛連翩鷹隼始擊鷲虞人獻時鮮嚴駕鳴儔  
侶攬轡過中田戎車方四牡文軒馭紫燕輿徒旣整飭容  
服麗且妍武騎列重圍前驅抗修旃倏忽似回飈絡繹若  
浮煙鼓噪山淵動衝塵雲霧連輕繒拂素電織網蔭長川  
游魚未暇竄歸雁不得還由基控繁弱公差操黃間機發

應弦倒一縱連雙肩  
僵禽正狼藉落羽何翩翩  
積獲被山阜流血丹  
中原馳騁未及勸  
曜靈俄移晷結罝彌藪澤  
囂聲振四鄙鳥驚觸白刃  
獸駭掛流矢仰手接游鴻  
舉足蹴犀兕如黃批狡兔  
青骹撮飛雉鵠鷺不盡收  
鳧鷖安足視日冥徒御勞  
賞勤課能否野饗會眾賓  
玄酒甘且旨燔炙播遺芳  
金觴浮素蟻珍羞墜歸雲  
織肴出淥水四氣運不停  
年時何亶亶人生忽如寄  
居世遽能幾至人同禍福  
達士等生死榮辱渾一門  
安知惡與美游放使心狂  
覆車難再履伯陽爲我誠  
檢跡投清軌

壯士篇

天地相震蕩回薄不知窮人物稟常格有始必有終年時  
俛仰過功名宜速崇壯士懷憤激安能守虛沖乘我大宛  
馬撫我繁弱弓長劍橫九野高冠拂玄穹慷慨成素霓嘯  
吒起清風震響駭八荒奮威曜四戎濯鱗滄海畔馳騁大  
漠中獨步聖明世四海稱英雄

答何劭三首

吏道何其迫窅然坐自拘纓綬爲徽纆文憲焉可踰恬曠  
苦不足煩促每有餘良朋貽新詩示我以游娛穆如灑清  
風煥若春華敷自昔同寮寀於今比園廬衰疾近辱殆庶  
幾竝懸與散髮重陰下抱杖臨清渠屬耳聽鶯鳴流目翫

儵魚從容養餘日取樂於桑榆

洪鈞陶萬類大塊稟羣生明闇信異姿靜躁亦殊形自予  
及有識志不在功名虛恬竊所好文學少所經忝荷旣過  
任白日已西傾道長苦智短責重困才輕周任有遺規其  
言明且清負乘爲我戒夕惕坐自驚是用感嘉貺寫心出  
中誠發篇雖溫麗無乃違其情

駕言歸外庭放志永棲遲相伴步園疇春草鬱鬱滋榮觀  
雖盈日親友莫與偕悟物增隆思結戀慕同儕援翰屬新  
詩永歎有餘懷

情詩五首



北方有佳人端坐鼓鳴琴終晨撫管絃日夕不成音憂來  
結不解我思存所欽君子尋時役幽妾懷苦心初爲三載  
別於今久滯淫昔邪生戶牖庭內自成林翔鳥鳴翠閣草  
蟲相和吟心悲易感激俛仰淚流衿願託晨風翼束帶侍  
衣衾

明月曜清景曦光照玄墀幽人守靜夜迴身入空帷束帶  
俟將朝廓落晨星稀寐假交精爽覲我佳人姿巧笑媚權  
靨聯娟眸與眉寤言增長歎悽然心獨悲

清風動帷簾晨月照幽房佳人處遐遠蘭室無容光襟懷  
擁虛景輕衾覆空牀居歡惜夜促在戚怨宵長撫枕獨嘯

歎感慨心內傷

君居北海陽妾在江南陰懸邈極修塗山川阻且深承懼  
注隆愛結分投所欽銜恩篤守義萬里託微心

游目四野外逍遙獨延佇蘭蕙緣清渠繁華蔭綠渚佳人  
不在茲取此欲誰與巢居知風寒穴處識陰雨不曾遠離  
別安知慕儔侶

雜詩三首

晷度隨天運四時互相承東壁正昏中涸陰寒節升繁霜  
降當夕悲風中夜興朱火青無光蘭膏坐自凝重衾無暖  
氣挾續如懷冰伏枕終遙夕寤言莫子膺永思慮崇昔慨

然獨拊膺

逍遙游春空容與淥池阿白蘋開素葉朱草茂丹華微風  
搖蕙若增波動芰荷榮彩曜中林流馨入綺羅王孫游不  
歸修路邈以遐誰與翫遺芳佇立獨咨嗟

荏苒日月運寒暑忽流易同好逝不存迢迢遠離析房櫳  
自來風戶庭無行跡蒹葭生牀下蛛蝥網四壁懷思豈不  
隆感物重鬱積游雁比翼翔歸鴻知接翮來哉彼君子無  
愁徒自隔

擬古

松生壠坂上百尺下無枝東南望河尾西北隱崑崖剛風

振山籟朋鳥夜驚離悲涼貫年節葱綠恆若斯安得草木  
心不怨寒暑移

成公綏

中宮詩

天地不獨立造化由陰陽乾坤垂覆載日月曜重光治國  
先家道立教起閭房二妃濟有虞三母隆周王塗山興大  
禹有莘佐成湯齊晉伯諸侯皆賴姬與姜關雎思賢妃此  
言安可忘

塗中作

洋洋熊耳流巍巍伊闕山高岡碣崔嵬雙阜夾長川素石

九  
言  
漢  
晉  
一  
何磷磷水禽何翩翩遠涉許穎路顧思邈綿綿鬱陶懷所  
親引領情倂然

傅玄

惟漢行

危哉鴻門會沛公幾不還輕裝入人軍投身湯火間兩雄  
不俱立亞父見此權項莊奮劍起白刃何翩翩伯身雖爲  
蔽事促不及還張良懼坐側高祖變龍顏賴得樊將軍虎  
叱項王前瞋目駭三軍磨牙咀豚肩空卮讓伯主臨急吐  
奇言威凌萬乘主指顧回泰山神龍困鼎鑊非噲豈得全  
狗屠登上將功業信不原健兒實可慕腐儒安足歎

蹙歌行

日出東南隅照我秦氏樓秦氏有好女自字爲羅敷首戴  
金翠飾耳綴明月珠白素爲下裙丹霞爲上襦一顧傾朝  
市再顧國爲虛問女居安在當在城南居青樓臨大巷幽  
門結重樞使君自南來駟馬立踟躕遣吏謝賢女豈可同  
行車斯女長跪對使君言何殊使君自有婦賤妾有鄙夫  
天地正厥位願君改其圖

長歌行

利害同根源賞下有甘鉤義門近口塘虎口出通侯撫劍  
安所趨蠻方未順流蜀賊阻石城吳寇馮龍舟二軍多壯

士聞賊如見讐投身効知己徒生心所羞鷹隼厲天翼恥  
與燕雀游成敗在縱者無令鷲鳥憂

豫章行苦相篇

苦相身爲女卑陋難再陳男兒當門戶墮地自生神雄心  
志四海萬里望風塵女育無炊愛不爲家所珍長大逃深  
室藏頭羞見人垂淚適他鄉忽如雨絕雲低頭和顏色素  
齒結朱唇跪拜無復數婢妾如嚴賓情合同雲漢葵藿仰  
陽春心乖甚水火百惡集其身玉顏隨年變丈夫多好新  
昔爲形與影今爲胡與秦胡秦時相見一絕踰參辰

和秋胡行

秋胡納令室三日宦他鄉皎皎潔婦姿泠泠守空房燕婉  
不終夕別如參與商憂來猶四海易感難可防人言生日  
短愁者苦夜長百草揚春華攘腕採柔桑素手尋繁枝落  
葉不盈筐羅衣翳玉體回目流采章君子倦仕歸車馬如  
龍驤精誠馳萬里旣至兩相忘行人悅令顏借息此樹旁  
誘以逢卿喻遂下黃金裝烈烈貞女憤言辭厲秋霜長驅  
及居室奉金升北堂母立呼婦來歡情樂未央秋胡見此  
婦惕然懷探湯負心豈不慙永誓非所望清濁必異源鳧  
鳳不竝翔引身赴長流果哉潔婦腸彼夫旣不淑此婦亦

太剛



飲馬長城窟行

青青河邊草悠悠萬里道草生在春時遠道還有期春至  
草不生期盡歎無聲感物懷思心夢想發中情夢君如鴛  
鴦比翼雲間翔既覺寂無見曠如參與商夢君結同心比  
翼游北林既覺寂無見曠如商與參河洛自用固不如中  
岳安回流不及返浮雲往自還悲風動思心悠悠誰知者  
懸景無停居忽如馳駟馬傾耳懷音響轉目淚雙墮生存  
無會期要君黃泉下

放歌行

靈龜有枯甲神龍有腐鱗人無千歲壽存質空相因朝露

尚移景促哉水上塵邱豕如履綦不識故與新高樹來悲  
風松柏垂威神曠野何蕭條顧望無生人但見狐狸跡虎  
豹自成羣孤雛攀樹鳴離鳥何續紛愁子多哀心塞耳不  
忍聞長嘯淚雨下太息氣成雲

豔歌行有女篇

有女懷芬芳媞媞步東廂蛾眉分翠羽明目發清揚丹唇  
翳皓齒秀色若珪璋巧笑露權厖眾媚不可詳令儀希世  
出無乃古毛嬙頭安金步搖耳繫明月璫珠環約素腕翠  
羽垂鮮光文袍綴藻黼玉體映羅裳容華旣已豔志節擬  
秋霜徽音冠青雲聲響流四方妙哉英媛德宜配侯與王

靈應萬世合日月時相望  
媒氏陳東帛羔雁鳴前堂  
百兩盈中路起若鸞鳳翔  
凡夫徒踴躍望絕殊參商

怨歌行朝時篇

昭昭朝時日皎皎晨明月  
十五入君門一別終華髮  
同心忽異離曠如胡與越  
胡越有會時參辰遼且闊  
形影雖髣髴音聲寂無達  
纖絃感促柱觸之哀聲發  
情思如循環憂來不可遏  
塗山有餘恨詩人詠采葛  
蜻蛚吟牀下回風起幽闈  
春榮隨路落芙蓉生木末  
自傷命不遇良辰永乖別  
已爾可奈何譬如紈素裂  
孤雌翔故巢星流光景絕  
魂神馳萬里甘心要同穴

秋蘭篇

秋蘭蔭玉池池水清且芳芙蓉隨風發中有雙鴛鴦雙魚  
自踴躍兩鳥時迴翔君其歷九秋與妾同衣裳

明月篇

皎皎明月光灼灼朝日暉昔爲春蠶絲今爲秋女衣丹唇  
列素齒翠彩發蛾眉嬌子多好言歡合易爲姿玉顏盛有  
時秀色隨年衰常恐新間舊變故興細微浮萍本無根非  
水將何依憂喜更相接樂極還自悲

西長安行

所思兮何在乃在西長安何用存問妾香橙雙珠環何用

重存問羽爵翠琅玕今我兮聞君更有兮異心香亦不可  
燒環亦不可沈香燒日有歇環沈日自深

雜詩三首

志士惜日短愁人知夜長攝衣步前庭仰觀南雁翔  
玄景隨形運流響歸空房清風何飄颻微月出西方繁星依青  
天列宿自成行蟬鳴高樹間野鳥號東廂纖雲時髮鬢渥  
露沾我裳良時無停景北斗忽低昂常恐寒節至凝氣結  
爲霜落葉隨風摧一絕如流光

閒夜微風起明月照高臺清響呼不應玄景招不來  
廚人進藿茹有酒不盈杯安貧福所與富貴爲禍媒  
金玉雖高

堂於我賤蒿萊

鵲巢北城側雀乳空井中居不附龍鳳常畏蛇與蟲依賢  
義不恐近暴自當窮

苦雨

徂暑未一旬重陽翳朝霞厥初月離畢積日遂滂沱屯雲  
結不解長溜周四阿霖雨如到井黃潦起洪波湍深激牆  
隅門庭若波河炊爨不復舉竈中生蛙蝦

古詩

東方大明星光景照千里少年舍家游思心晝夜起

傅咸

贈何劭王濟

并序

朗陵公何敬祖咸之從內兄國子祭酒王武子咸從姑之外孫也竝以明德見重於世咸親之重之情猶同生義則師友何公旣登侍中武子俄而亦作二賢相得甚歡咸亦慶之然自恨闇劣雖願其繼繼而從之末由厯試無效且有家艱心存目替賦詩申懷以貽之云爾

日月光太清列宿曜紫微赫赫大晉朝明明闕皇闕吾兄旣鳳翔王子亦龍飛雙鸞游蘭渚二離揚清暉攜手升玉階竝坐侍丹帷金璫綴惠文煌煌發令姿斯榮非攸庶繼綵情所希豈不企高蹤麟趾邈難追臨川靡芳餌何爲守

空坻槁葉待風飄逝將與君違違君能無戀尸素當言歸  
歸身蓬華廬樂道以忘饑進則無云補退則恤其私但願  
隆弘美王度日清夷

棗據

雜詩

吳寇未殄滅亂象侵邊疆天子命上宰作蕃於漢陽開國  
建元士玉帛聘賢良予非荆山璞謬登和氏場羊質服虎  
文燕翼假鳳翔旣懼非所任怨彼南路長千里旣悠邈路  
次限關梁僕夫罷遠涉車馬困山岡深谷下無底高巖暨  
寫蒼豐草停滋潤霧露沾衣裳玄林結陰氣不風自寒涼

八代詩選

五言二



顧瞻情感切惻愴心哀傷士生則懸弧有事在四方安得  
恆逍遙端坐守閨房引義割外情內感實難忘

失題

有鳳適南中終日無歡娛自怨梧桐遠行飛棲桑榆奮迅  
振長翼俛仰向天衢簫韶逝無聞朝陽不可須

劉伶

北芒客舍詩

泱泱望舒隱駝黜玄夜陰寒雞思天曙擁翅吹長音蚊蚋  
歸豐草枯葉散蕭林陳醴發悴顏巴歛暢真心緼被終不  
曉斯歎信難任何以除斯歎付之與瑟琴長笛響中夕聞

此消胸襟

司馬彪

贈山濤

若若椅桐樹寄生於南岳上  
淩青雲霓下臨千仞谷處身  
孤且危於何託余足昔也植  
朝陽傾枝俟鸞鷲今者絕世  
用倥偬見迫束班匠不我顧  
牙曠不我錄焉得成琴瑟何  
由揚妙曲冉冉三光馳逝者  
一何速中夜不能寐撫劍起  
躑躅感彼孔聖歎哀此年命  
促卞和潛幽冥誰能證奇璞  
冀願神龍來揚光以見燭

雜詩

百草應節生含氣有深淺秋蓬獨何辜飄颻隨風轉長飈  
一飛薄吹我之四遠搔首望故株邈然無由返

何劭

贈張華

四時更代謝懸象迭卷舒暮春忽復來和風與節俱俯臨  
清泉涌仰觀嘉禾敷周旋我陋圃西瞻廣武廬旣貴不忘  
儉處有能存無鎮俗在簡約樹塞焉足慕在昔同班司今  
者並園墟私願偕黃髮逍遙綜琴書舉爵茂陰下攜手共  
躊躇奚用遺形骸忘筌在得魚

游仙詩

青青陵上松亭亭高山柏光色冬夏茂根柢無彫落吉士  
懷真心悟物思遠託揚志玄雲際流目矚巖石羨昔王子  
喬友道發伊洛迢遞陵峻岳連翩御飛鶴抗跡遺萬里豈  
戀生民樂長懷慕仙類眇然心綿邈

雜詩

秋風乘夕起明月照高樹閒房來清氣廣庭發暉素靜寂  
愴然歎惆悵忽游顧仰視垣上草俯察階下露心虛體自  
輕飄飄若仙步瞻彼陵上柏想與神人遇道深難可期精  
微非所慕勤思終遙夕永言寫情慮

王浚

從幸洛水餞王公歸國詩

聖主應期運至德敷彝倫神道垂大教玄化被無垠欽若  
崇古制建侯屏四鄰皇輿迴羽蓋高會洛水濱臨川講妙  
藝縱酒釣潛鱗八音以迭奏蘭羞備時珍古人亦有言爲  
國不患貧與蒙廟庭施幸得廁大鈞羣僚荷恩澤朱顏感  
獻春賦詩盡下情至感暢人神長流無舍逝白日入西津  
奉辭慕華輦侍衛路無因馳情繫帷幄乃心戀軌塵

陸機

日出東南隅行

扶桑升朝暉照此高臺端高臺多妖麗濬房出清顏淑貌

耀皎日惠心清且閒美目揚玉澤蛾眉象翠翰鮮膚一何  
潤秀色若可餐窈窕多容儀婉媚巧笑言暮春春服成粲  
粲綺與紈金雀垂藻翹瓊佩結瑤璠方駕揚清塵濯足洛  
水瀾藹藹風雲會佳人一何繁南崖充羅幕北渚盈軒軒  
清川含藻景高岸被華丹馥馥芳袖揮泠泠纖指彈悲歌  
吐清響雅舞播幽蘭丹唇含九秋妍跡陵七盤赴曲迅鷺  
鴻蹈節如集鸞綺態隨顏變沈姿無定源俯仰紛阿那顧  
步咸可懽遺芳結飛颺浮景暎清湍冶容不足詠春游良  
可歎

挽歌三首

卜擇考休貞嘉命咸在茲夙駕警徒御結轡頓重基龍恍  
被廣柳前驅矯輕旗殯宮何嘈嘈哀響沸中闈中闈且勿  
謹聽我薤露詩死生各異倫祖載當有時舍爵兩楹位啟  
殯進靈輜飲餞觴莫舉出宿歸無期惟衽曠遺影棟宇與  
子辭周親咸犇湊友朋自遠來翼翼飛輕軒駸駸策素騏  
按轡遵長薄送子長夜臺呼子子不聞泣子子不知歎息  
重櫬側念我疇昔時三秋猶足收萬世安可思殉沒身易  
亡殺子非所能含言言哽咽揮涕涕流離

流離親友思惆悵神不泰素驂佇輜軒玄駟驚飛蓋哀鳴  
興殯宮迴遲悲野外魂輿寂無響但見冠與帶備物象平

生長旌誰爲旆悲風微行軌傾雲結流靄振策指靈北駕  
言從此逝

重阜何崔嵬玄廬竄其間磅礴立四極穹隆放蒼天側聽  
陰溝湧臥觀天井懸廣宵何寥廓大暮安可晨人往有返  
歲我行無歸年昔居四民宅今託萬鬼鄰昔爲七尺軀今  
成灰與塵金玉素所佩鴻毛今不振豐肌饗螻蟻妍姿永  
夷泯壽堂延魑魅虛無自相賓螻蟻爾何怨魑魅我何親  
拊心痛荼毒永歎莫爲陳

長歌行

逝矣經天日悲哉帶地川寸陰無停晷尺波豈徒旋年往



信勁矢時來亮急弦遠期鮮克及盈數固希全容華夙夜  
零禮澤坐自捐茲物苟難停吾壽安得延俯仰逝將過倏  
忽幾何閒慷慨亦焉訴天道良自然但恨功名薄竹帛無  
所宣道及歲未暮長歌乘我閒

君子行

天道夷且簡人道險而難休咎相乘躡翻覆若波瀾去疾  
苦不遠疑似實生患近火固宜熱履冰豈惡寒掇蜂滅天  
道拾塵惑孔顏逐臣尙何有棄友焉足歎福鍾恆有兆禍  
集非無端天損未易辭人益猶可歡朗鑒豈遠假取之在  
傾冠近情苦自信君子防未然

苦寒行

北游幽朔城涼野多險難俯入窮谷底仰涉高山盤凝冰  
結重磧積雪被長巒陰雲興巖側悲風鳴樹端不覩白日  
景但聞寒鳥喧猛虎憑林嘯玄猿臨岸歎夕宿喬木下慘  
愴恆鮮歡渴飲堅冰漿饑待零露餐離思固已久寤寐莫  
與言劇哉行役人慊慊恆苦寒

豫章行

汎舟清川湄遙望高山陰川陸殊塗軌懿親將遠尋三荆  
歡同株四鳥悲異林樂會良自古悼別豈獨今寄世將幾  
何日昃無停陰前路既已多後塗隨年侵促促薄暮景曠



玉臺下垂影滄浪泉霑潤旣已渥結根奧且堅四節逝不  
處繁華難久鮮淑氣與時殞餘芳隨風捐天道有遷易人  
理無常全男歡智傾愚女愛衰避妍不惜微軀退但懼蒼  
蠅前願君廣末光照妾薄暮年

折揚柳

邈矣垂天景壯哉奮地雷豐隆豈久響華光但西隕日落  
似有竟時逝恆若催仰悲朗月運坐觀旋蓋迴盛門無再  
入衰房莫苦開人生固已短出處鮮爲諧慷慨惟昔人興  
此千載懷升龍悲絕處葛藟變條枝寤寐豈虛歎曾是感  
與摧弭意無足歡願言有餘哀

飲馬長城窟行

驅馬陟陰山山高馬不前往問陰山候勁虜在燕然戎車  
無停軌旌旆屢徂遷仰憑積雪巖俯涉堅冰川冬來秋未  
返去家邈以縣獫狁亮未夷征人豈徒旋末德爭先鳴凶  
器無兩全師克薄賞行軍沒微軀捐將遵甘陳跡收功單  
于旃振旅勞歸士受爵橐街傳

門有車馬客

門有車馬客駕言發故鄉念君久不歸濡跡涉江湘投袂  
赴門塗攬衣不及裳拊膺攜客泣掩淚敘溫涼借問邦族  
間惻愴論存亡親友多零落舊齒皆彫喪市朝忽遷易城

闕或邱荒墳壟日月多松柏鬱芒芒天道信崇替人生安  
得長慷慨惟平生俛仰獨悲傷

齊謳行

營北負海曲沃野爽且平洪川控河濟崇山入高冥東被  
姑尤側南界聊攝城海物錯萬類陸產尙千名孟諸吞楚  
夢百二侔秦京惟師恢東表桓后定周傾天道有迭代人  
道無久盈鄙哉牛山歎未及至人情爽鳩苟已徂吾子安  
得停行行將復去長存非所營

班婕妤

婕妤去辭寵淹留終不見寄情在玉階託意唯團扇春首

暗階除秋草蕪高殿黃昏履綦絕愁來空雨面

駕言出北闕行

駕言出北闕躑躅遵山陵長松何鬱鬱邱墓互相承念昔  
徂歿子悠悠不可勝安寢重冥廬天壤莫能興人生何所  
促忽如朝露凝辛苦百年間戚戚如履冰仁知亦何補遷  
化有明徵求仙鮮克仙太虛不可凌良會罄美服對酒  
宴同聲

從軍行

苦哉遠征人飄飄窮四遐南陟五嶺巔北戍長城阿深谷  
邈無底崇山鬱嵯峩奮臂攀喬木振跡涉流沙隆暑固已

慘涼風嚴且苛夏條集鮮藻寒冰結衝波胡馬如雲屯越  
旗亦星羅飛鋒無絕影鳴鏑自相和朝食不免胄夕息常  
負戈苦哉遠征人撫心悲如何

梁甫吟

玉衡既已驂羲和若飛凌四運循環轉寒暑自相承冉冉  
年時暮迢迢天路澂招搖東北指大火西南昇悲風無絕  
響玄雲互相仍豐沐憑川結零露彌天凝年命時相逝慶  
雲鮮克乘履信多愆期思順焉足憑慷慨臨川響非此孰  
爲興哀吟梁甫巔歎息獨拊膺

君子有所思行



命駕登北山延佇望城郭塵里一何盛街巷紛漠漠甲第  
崇高闔洞房結阿閣曲池何湛湛清川帶華薄邃宇列綺  
窗蘭室接羅幕淑貌色斯升哀音承顏作人生誠行邁容  
華隨年落善哉膏粱士營生奧且薄宴安消靈根鳩毒不  
可恪無以肉食資取笑葵與藿

悲哉行

游客芳春林春芳傷客心和風飛清響鮮雲垂薄陰蕙草  
饒淑氣時鳥多好音翩翩鳴鳩羽啾啾倉庚吟幽蘭盈通  
谷長秀被高岑女蘿亦有託蔓葛亦有尋傷哉客游士憂  
思一何深目感隨氣草耳悲詠時禽寤寐多遠念緬然若

飛沈願託歸風響寄言遺所欽

前緩聲歌

游仙聚靈族高會層城阿長風萬里舉慶雲鬱差我宓妃  
興洛浦王韓起太華北徵瑤臺女南要湘川娥肅肅宵駕  
動翩翩翠蓋羅羽旗棲瓊鸞玉衡吐鳴和太容揮高絃洪  
崖發清歌獻酬既已周輕舉乘紫霞總轡扶桑枝濯足湯  
谷波清輝溢天門垂慶惠皇家

吳趨行

楚妃且勿歎齊娥且莫謳四坐並清聽聽我歌吳趨吳趨  
自有始請從閨門起閨門何戔戔飛閣跨通波重欒承游

極回軒啟曲阿藹藹慶雲被泠泠祥風過山澤多藏育土  
風清且嘉泰伯導仁風仲雍揚其波穆穆延陵子灼灼光  
諸華王跡隕陽九帝功興四遐大皇自富春矯手頓世羅  
邦彥應運興粲若春林葩屬城咸有士吳邑最爲多八族  
未足侈四姓實名家文德熙淳懿武功侔山河禮讓何濟  
濟流化自滂沱淑美難窮紀商摧爲此歌

贈馮文熊

昔與二三子游息承華南拊翼同枝條翻飛各異尋苟無  
凌風翻徘徊守故林慷慨誰爲感願言懷所欽發軫清洛  
泗驅馬大河陰佇立望朔塗悠悠迥且深分索古所悲志

士多苦心悲情臨川結苦言隨風吟愧無雜佩贈良訊代  
兼金夫子茂遠猷款誠寄惠音

於承明作與弟士龍

牽世嬰時網駕言遠徂征飲餞豈異族親戚弟與兄婉變  
居人思紆鬱游子情明發遺安寐晤言涕交纓分塗長林  
側揮袂萬始亭伫眄要遐景傾耳玩餘聲南歸憇永安北  
邁頓承明永安有昨軌承明子棄子俯仰悲林薄慷慨舍  
辛楚懷往歡絕端悼來憂成緒感別慘舒翮思歸樂遵渚  
贈弟士龍

行矣怨路長怒焉傷別促指塗悲有餘臨觴歡不足我若

西流水子爲東峙岳慷慨逝言感徘徊居情育安得攜手  
俱契闊成駢服

贈尙書郎顧彥先二首

大火貞朱光積陽熙自南望舒離金虎屏翳吐重陰淒風  
迓時序苦雨遂成霖朝游忘輕羽夕息憶重衾感物百憂  
生纏綿自相尋與子隔蕭牆蕭牆阻且深形影曠不接所  
託聲與音音聲日夜闊何用慰吾心

贈顧交趾公貞

顧侯體明德清風肅已邁發跡翼藩后改授撫南裔伐鼓  
五嶺表揚旌萬里外遠績不辭小立德不在大高山安足

凌巨海猶縈帶惆悵瞻飛駕引領望歸旆

答張士然

潔身躋秘閣秘閣峻且玄終朝理文案薄暮不遑眠駕言  
巡明祀致敬在祈年逍遙春王圃躑躅千畝田迴渠繞曲  
陌通波扶直阡嘉穀垂重穎芳樹發華顛余固水鄉士總  
轡臨清淵戚戚多遠念行行遂成篇

贈從兄車騎

孤獸思故藪離鳥悲舊林翩翩游宦子辛苦誰爲心髣髴  
谷水陽婉孌崑山陰營魂懷茲土精爽若飛沈寤寐靡安  
豫願言思所欽感彼歸塗艱使我怨慕深安得忘歸草言

樹背與襟斯言豈虛作思鳥有悲音

爲顧彥先贈婦二首

辭家遠行游悠悠三千里京洛多風塵素衣化爲緇循身  
悼憂苦感念同懷子隆思亂心曲沈歎滯不起歡沈難克  
興心亂誰爲理願假歸鴻翼翻飛游江汜

東南有思婦長歎充幽闕借問歎何爲佳人眇天末游宦  
久不歸山川修且闊形影參商乖音息曠不達離合非有  
常譬彼絃與箏願保金石軀慰妾長饑渴

爲陸思遠婦作

二合兆嘉偶女子禮有行潔已入德門終遠母與兄如何

耽時寵游宦忘歸寧雖爲三載婦顧景媿虛名歲暮饒悲  
風洞房涼且清拊枕循薄質非君誰見榮離君多悲心寤  
寐勞人情敢忘桃李陋側想瑤與瓊

爲周夫人贈車騎

碎碎織細練爲君作縵縵君行豈有顧憶君是妾夫昔者  
得君書聞君在高平今時得君書聞君在京城京城華麗  
所璀璨多異人男兒多遠志豈知妾念君昔者與君別歲  
律薄將暮日月一何速素秋墜湛露湛露何冉冉思君隨  
歲晚對食不能餐臨觴不能飯

赴洛二首



希世無高符營道無烈心靖端肅有命假楫越江潭親友  
贈予邁揮淚廣川陰撫膺解攜手永歎結遺音無跡有所  
匿寂寞聲必沈肆目眇不及緬然若雙潛南望泣玄濟北  
邁涉長林谷風拂修薄油雲翳高岑疊疊孤獸騶嚶思  
鳥吟感物戀堂室離思一何深伫立慨我歎寤寐涕盈衿  
惜無懷歸志辛苦誰爲心

羈旅遠游宦託身承華側撫劍遵銅輦振纓盡祇肅歲月  
一何易寒暑忽已革載離多悲心感物情悽惻慷慨遺安  
豫永歎廢寢食思樂樂難誘日歸歸未克憂苦欲何爲纏  
緜胸與臆仰瞻凌霄鳥羨爾歸飛翼

赴洛道中作二首

總轡登長路鳴咽辭密親  
借問子何之世網嬰我身  
永歎遵北渚遺思結南津  
行行遂已遠野塗曠無人  
山澤紛紜餘林薄杳阡  
眠虎嘯深谷底雞鳴高樹  
巔哀風中夜流孤獸更我  
前悲情觸物感沈思鬱纏  
綿伫立望故鄉顧影悽  
白憐

遠游越山川山川修且廣  
振策陟崇北安轡遵平莽  
夕息抱影寐朝徂銜思往  
頓轡倚高巖側聽悲風響  
清露墜素輝明月一何朗  
撫枕不能寐振衣獨長想

擬行行重行行

悠悠行邁遠戚戚憂思深此思亦何思思君微與音音微  
日夜離緬邈若飛沈王鮪懷河岫晨風思北林游子眇天  
末還期不可尋驚颺寒反信歸雲難寄音佇立想萬里沈  
憂萃我心攬衣有餘帶循形不盈衿去去遺情累安處撫  
清琴

擬今日良宴會

閒夜命懽友置酒迎風館齊僮梁甫吟秦娥張女彈哀音  
繞棟宇遺響入雲漢四座咸同志羽觴不可算高談一何  
綺蔚若朝霞爛人生無幾何爲樂常苦宴譬彼司晨鳥揚  
聲當及旦曷爲恆憂苦守此貧與賤

擬迢迢牽牛星

昭昭清漢輝粲粲光天步牽牛西北迴織女東南顧華容  
一何冶揮手如振素怨彼河無梁悲此年歲暮跂彼無良  
緣睨焉不得度引領望大川雙涕如霑露

擬涉江采芙蓉

上山采瓊蘂窮谷饒芳蘭采采不盈掬悠悠懷所歡故鄉  
一何曠山川阻且難沈思鍾萬里躑躅獨吟歎

擬青青河畔草

靡靡江蘼草熠熠生河側皎皎彼妹子阿那當軒織粲粲  
妖容姿灼灼美顏色良人游不歸偏棲獨隻翼空房來悲

風中夜起歎息

擬明月何皎皎

安寢北堂上明月入我牖照之有餘輝攬之不盈手涼風繞曲房寒蟬鳴高柳踟躕感節物我行永久游宦會無成離思難常守

擬蘭若生朝陽

嘉樹生朝陽凝霜封其條執心守時信歲寒終不彫美人何其曠灼灼在雲霄隆想彌年月長嘯入飛颺引領望天末譬彼向陽翹

擬青青陵上柏

冉冉高陵躋習習隨風翰人生當幾時譬彼濁水瀾戚戚  
多滯念置酒宴所歡方駕振飛轡遠游入長安名都一何  
綺城闕鬱盤桓飛閣纓虹帶層臺冒雲冠高門羅北闕甲  
第椒與蘭俠客控絕景都人駿玉軒遨游放情願慷慨爲  
誰歎

擬東城一何高

西山何其峻層曲鬱崔嵬零露彌天墜蕙葉憑林衰寒暑  
相因襲時逝忽如隕三閭結飛轡大耋嗟落暉曷爲牽世  
務中心若有違京洛多妖麗玉顏侔瓊蕤閒夜撫鳴琴惠  
音清且悲長歌赴促節哀響逐高徽一唱萬夫歎再唱梁

塵飛思爲河曲鳥雙游灑水湄

擬西北有高樓

高樓一何峻迢迢峻而安綺窗出塵冥飛陛躡雲端佳人  
撫琴瑟纖手清且閑芳氣隨風結哀響馥若蘭玉容誰能  
顧傾城在一彈仁立望日仄躑躅再三歎不怨仁立久但  
願歌者歡思駕歸鴻羽比翼雙飛翰

擬庭中有奇樹

歡友蘭時往迢迢匿音微虞淵引絕景四節逝若飛芳草  
久已茂佳人竟不歸躑躅遵林渚惠風入我懷感物戀所  
歡采此欲貽誰

擬明月皎夜光

歲暮涼風發，昊天肅明明。  
招搖西北指，天漢東南傾。  
朗月照閒房，蟋蟀吟戶庭。  
翩翩歸雁集，嘒嘒寒蟬鳴。  
昔同宴友翰，飛戾高冥服。  
美改聲聽居，愉遺舊情織。  
女無機杼，大梁不架楹。

招隱詩

明發心不夷，振衣聊躑躅。  
躑躅欲安之，幽人在浚谷。  
朝采南澗藻，夕息西山足。  
輕條象雲構，密葉承翠幄。  
激楚伫蘭林，回芳薄秀木。  
山溜何泠泠，飛泉漱鳴玉。  
哀音附靈波，頽響赴曾曲。  
至樂非有假，安事澆淳樸。  
富貴苟難圖，稅駕從



所欲

園葵詩二首

種葵北園中葵生鬱萋萋朝榮東北傾夕穎西南晞零露  
垂鮮澤朗月耀其輝時逝柔風戢歲暮商飈飛曾雲無溫  
液嚴霜有凝威幸蒙高墉德玄景蔭素糝豐條並春盛落  
葉後秋衰慶被晚彫福忘此孤生悲

翩翩晚彫葵孤生寄北蕃被蒙覆露惠微軀後時殘庇足  
周一智生理各萬端不苦聞道易但傷知命難

戶鄉亭

東游觀鞏洛逍遙北墓間秋草漫長柯寒水入雲煙發軫

有夙宴息駕無愚賢

陸雲

答兄平原

悠悠塗可極別促怨會長銜思戀行邁興言在臨觴南津  
有絕濟北渚無河梁神往同逝感形留悲參商軌若殊  
跡牽牛非服箱

答張士然

行邁越長川飄飄冒風塵通波激枉渚悲風薄北榛修路  
無窮跡井邑自相循百城各異俗千室非良鄰歡舊難假  
合風土豈虛親感念桑梓域髣髴眼中人靡靡日夜遠眷

眷懷苦辛

爲顧彥先贈婦往返四首

我在三川陽子居五湖陰山海一何曠譬彼飛與沈目想  
清慧姿耳存淑媚音獨寐多遠念寤言撫空衿彼美同懷  
子非爾誰爲心

悠悠君行邁熒熒妾獨止山河安可踰永路隔萬里京師  
多妖冶粲粲都人子雅步擢纖腰巧言發皓齒佳麗良可  
美衰賤焉足紀遠蒙眷顧言銜恩非望始

翩翩飛蓬征郁郁寒木榮游止固殊性浮沈豈一情隆愛  
結在昔信誓貫三靈秉心金石固豈從時俗傾美目逝不

顧纖腰徒盈盈何用結中款仰指北辰星

浮海難爲水游林難爲觀容色貴及時朝華忌日晏皎皎  
彼妹子灼灼懷春粲西城善雅舞總章饒清彈鳴簧發丹  
唇朱絃繞素腕輕裾猶電揮雙袂如霧散華容溢藻幄哀  
響入雲漢知音世所希非君誰能讚棄置北辰星問此玄  
龍煥時暮復何言華落理必賤

潘岳

金谷集作詩

王生和鼎實石子鎮海沂親友各言邁中心悵有違何以  
敘離思攜手游郊畿朝發晉京陽夕次金谷湄迴谿繁曲

阻峻阪路威夷綠池泛淡淡青柳何依依濫泉龍鱗瀾激  
波連珠揮前庭樹沙棠後園植烏桺靈囿繁石榴茂林列  
芳梨飲至臨華沼遷坐登隆坻玄醴染朱顏但慙杯行遲  
楊桴撫靈鼓簫管清且悲春榮誰不暮歲寒良獨希投分  
寄石友白首同所歸

河陽縣作二首

微身輕蟬翼弱冠忝嘉招在疚妨賢路再升上宰朝猥荷  
公叔舉連陪厠王寮長嘯歸東山擁耒耨時苗幽谷茂纖  
葛峻巖敷榮條落英隕林趾飛莖秀陵喬卑高亦何常升  
降在一朝徒恨良時泰小人道遂消譬如野田蓬幹流隨

風飄昔倦都邑游今掌河朔徭登城眷南顧凱風揚微綃  
洪流何浩蕩修芒鬱若蕘誰謂晉京遠室邇身實遼誰謂  
邑宰輕令名患不劭人生天地間百年孰能要頰如槁石  
火譬若截道颺齊都無遺聲桐鄉有餘謠福謙在純約害  
盈由於驕雖無君人德視民庶不忒

日夕陰雲起登城望洪河川氣冒山嶺驚湍激巖阿歸雁  
暎蘭時游魚動圓波鳴蟬厲寒音時菊耀秋華引領望京  
室南路在伐柯大廈緬無覿崇芒鬱嗟峨總總都邑人擾  
擾俗化訛依水類浮萍寄松似懸蘿朱博糾舒慢楚風被  
瑯邪曲蓬何以直託身依叢麻黔黎竟何常政成在民和

位同單父邑愧無子賤歌豈敢陋微官但恐忝所荷

在懷縣作二首

南陸迎修景朱明送末垂初伏啟新節隆暑方赫曦朝想  
慶雲興夕遲白日移揮汗辭中宇登城臨清池涼颺自遠  
集輕襟隨風吹靈圃耀華果通衢列高椅瓜瓞蔓長苞薑  
芋紛廣畦稻栽肅芊芊黍苗何離離虛薄乏時用位微名  
日卑驅役宰兩邑政績竟無施自我違京輦四載迄於斯  
器非廊廟姿屢出固其宜徒懷越鳥志眷戀想南枝  
春秋代遷逝四運紛可喜寵辱易不驚戀本難爲思我來  
冰未判時暑忽隆熾感此還期淹歎彼年往駛登城望郊

旬游目歷朝寺小國寡民務終日寂無事白水過庭激綠  
槐夾門植信美非吾土祇攬懷歸志眷然顧鞏洛山川邈  
離異願言旋舊鄉畏此簡書忌祇奉社稷守恪居處職司  
內顧詩二首

靜居懷所歡登城望四澤春草鬱青青桑柘何奕奕芳林  
振朱榮淥水激素石初征冰未泮忽焉袵絺綌漫漫三千  
里迢迢遠行客馳情戀朱顏寸陰過盈尺夜愁極清晨朝  
悲終日夕山川信悠永願言良弗獲引領訊歸期沈思不  
可釋

獨悲安所慕人生若朝露綿邈寄絕域眷戀想平素爾情



既來追我心亦還顧形體隔不達精爽交中路不見山下  
松隆冬不易故不見澗邊柏歲寒守一度無謂希見疏在  
遠分彌固

悼亡詩三首

荏苒冬春謝寒暑忽流易之子歸窮泉重壤永幽隔私懷  
誰克從淹留亦何益僂仰恭朝命迴心反初役望廬思其  
人入室想所歷幃屏無髣髴翰墨有餘跡流芳未及歇遺  
挂猶在壁悵恍如或存周遑忡驚惕如彼翰林鳥雙栖一  
朝隻如彼游川魚比目中路析春風緣隙來晨霽承簷滴  
寢息何時忘沈憂日盈積庶幾有時衰莊缶猶可擊

皎皎窗中月照我室南端清商應秋至溽暑隨節闌凜凜  
涼風升始覺夏衾單豈曰無重續誰與同歲寒歲寒無與  
同朗月何朧朧展轉眄枕席長簟竟牀空牀空委清塵室  
虛來悲風獨無李氏靈髣髴爾容撫衿長歎息不覺涕  
霑霄霑霄安能已悲懷從中起寢興目存形遺音猶在耳  
上慙東門吳下愧蒙莊子賦詩欲言志此志難具紀命也  
可奈何長戚自令鄙

曜靈運天幾四節代遷逝淒淒朝露凝烈烈夕風厲奈何  
悼淑儷儀容永潛翳念此如昨日誰知已卒歲改服從朝  
政哀心寄私制茵疇張故房朔望臨爾祭爾祭詎幾時朔

望忽復盡衾裳一毀撤千載不復引壘壘  
相愍悲懷感物來泣涕應情殞駕言涉東阜望墳思紆軫  
徘徊墟墓閒欲去復不忍徘徊不忍去徒倚步踟躕落葉  
委埏側枯荻帶墳隅孤魂獨熒熒安知靈與無投心遵朝  
命揮涕強就車誰謂帝宮遠路極悲有餘

哀詩

灌如葉落樹邈若雨絕天雨絕有歸雲葉落何時連山氣  
冒岡嶺長風鼓松柏堂虛聞鳥聲室暗如日夕晝愁奄逮  
昏夜思忽終昔展轉獨悲窮泣下沾枕席人居天地間飄  
若遠行客先後詎能幾誰能弊金石

潘尼

贈侍御史王元貺

崑山積瓊玉廣廈構眾材游鱗萃靈沼撫翼希天階膏蘭孰爲消濟治由賢能王侯厭崇禮迴跡清憲臺蠖屈固小往龍翔迺大來協心毗聖世畢力讚康哉

贈隴西太守張正治詩

二八由唐顯周以多士隆羣靈感韶運理翮應翔風張生拔幽華蘋蘩登二宮未幾振朱錦剖符撫西戎及子仍同僚贈言貽爾躬威刑有時用唯德可令終

送盧景宣詩

楊朱焉所哭岐路重別離屈原何傷悲生離情獨哀知命  
雖無憂倉卒憶低迴歎氣從中發灑淚隨襟頽九重不常  
鍵閭闔有時開愧無紵衣獻貽言取諸懷

迎大駕

南山鬱岑崑洛川迅且急青松蔭修嶺綠繁被廣隰朝日  
順長途夕暮無所集歸雲乘憶浮淒風尋帷入道逢深識  
士舉手對吾揖世故尙未夷峻函方嶮澀狐狸夾兩轅豺  
狼當路立翔鳳嬰籠檻騏驥見維繫俎豆昔嘗聞軍旅素  
未習且少停君駕徐待干戈戢

八代詩選第五

八代詩選第五

華陽張杞年彥甫校

八代詩選

五言二  
看一

三

晉第二

八代詩選六

五言第四

長沙湘潭王闓運撰

左思

詠史八首

弱冠弄柔翰卓犖觀羣書著論準過秦作賦擬子虛邊城  
苦鳴鏑羽檄飛京都雖非甲冑士疇昔覽穰苴長嘯激清  
風志若無東吳鉞刀貴一割夢想騁良圖左眄澄江湘右  
盼定羌胡功成不受爵長揖歸田廬

鬱鬱澗底松離離山上苗以彼徑寸莖蔭此百尺條世胄  
躡高位英俊沈下僚地勢使之然由來非一朝金張藉舊

業七葉珥漢貂馮公豈不偉白首不見招

吾希段干木偃息藩魏君吾慕魯仲連談笑卻秦軍當世  
貴不羈遭難能解紛功成恥受賞高節卓不羣臨組不肯  
緹對珪甯肯分連璽耀前庭比之猶浮雲

濟濟京城內赫赫王侯居冠蓋蔭四術朱輪竟長衢朝集  
金張館暮宿許史廬南鄰擊鐘磬北里吹笙竽寂寂揚子  
宅門無卿相興寥寥空宇中所講在玄虛言論準宜尼辭  
賦擬相如悠悠百世後英名擅八區

皓天舒白日靈景耀神州列宅紫宮裏飛宇若雲浮峨峨  
高門內藹藹皆王侯自非攀龍客何爲歎來游被褐出閭



闔高步追許由振衣千仞岡濯足萬里流

荆軻飲燕市酒酣氣益震哀歌和漸離謂若傍無人雖無壯士節與世亦殊倫高眇邈四海豪右何足陳貴者雖自貴視之若埃塵賤者雖自賤重之若千鈞

主父宦不達骨肉還相薄買臣困樵採伉儷不安宅陳平無產業歸來鬻負郭長卿還成都壁立何寥廓四賢豈不偉遺烈光篇籍當其未遇時憂在填溝壑英雄有迹躔由來自古昔何世無奇才遺之在草澤

習習籠中鳥舉翮觸四隅落落窮巷士抱影守空廬出門無通路枳棘塞中塗計策棄不收塊若枯池魚外望無寸

八  
言  
選  
祿內顧無斗儲親戚還相蔑朋友日夜疎蘇秦北游說李  
斯西上書俛仰生榮華咄嗟復彫枯飲河期滿腹貴足不  
願餘巢林棲一枝可爲達士模

招隱二首

杖策招隱士荒塗橫古今巖穴無結構邱中有鳴琴白雪  
停陰岡丹葩曜陽林石泉漱瓊瑤纖鱗或浮沈非必絲與  
竹山水有清音何事待嘯歌灌木自悲吟秋菊兼餼糧幽  
蘭閒重襟躊躇足力煩聊欲投吾簪

經始東山廬果下自成榛前有寒泉井聊可瑩心神峭磽  
青蔥間竹柏得其真弱葉棲霜雪飛榮流餘津爵服無常

玩好惡有屈伸結綬生纏牽禪冠去埃塵惠連非吾屈首  
陽非吾仁相與觀所尙逍遙撰良辰

雜詩

秋風何冽冽白露爲朝霜柔條且夕勁綠葉日夜黃明月  
出雲崖皦皦流素光披軒臨前庭嗷嗷晨雁翔高志局四  
海塊然守空堂壯齒不恆居歲暮常慨慷

嬌女詩

吾家有嬌女皎皎頗白皙小字爲織素口齒自清歷鬢髮  
覆廣額雙耳似連璧明朝弄梳臺黛眉類掃跡濃朱衍丹  
唇黃吻瀾漫赤嬌語若連瑣忿速乃明愷握筆利彤管篆

刻未期兮。書愛緜素誦習矜所獲其姊字惠芳面目燦  
如畫輕妝喜縷邊臨鏡忘紡績舉觶擬京兆立的成復易  
玩弄眉頰間劇兼機杼役從容好趙舞延袖像飛翮上下  
絃柱際文史輒卷篋顧盼屏風畫如見已指摘丹青日塵  
闇明義爲隱蹟馳鶩翔園林果下皆生摘紅葩掇紫蒂萍  
實驟抵擲貪華風雨中倏忽數百適務躡霜雪戲重葦常  
累積并心注肴饌端坐理盤榻翰墨戢間按相與數離迷  
動爲鑪鉦屈屣履任之適止爲茶菽據吹吁對鼎鑊脂膩  
漫白袖煙薰染阿錫衣被皆重池難與次水碧任其孺子  
意羞受長者責瞥聞當與杖掩淚俱向壁

張翰

雜詩二首

暮春和氣應白日照園林青條若總翠黃華如散金嘉卉  
亮有觀顧此難久耽延頸無良塗頓足託幽深榮與壯俱  
去賤與老相尋歡樂不照顏慘愴發謳吟何嗟及古  
人可慰心

東鄰有一樹三紀裁可拱無花復無實亭亭雲中竦隴禽  
不爲巢短翮莫肯任忽有一飛鳥五色雜英華一鳴眾鳥  
至再鳴眾鳥羅長鳴搖羽翼百鳥互相和

張載

登白兔樓

重城結曲阿飛宇起層樓累棟出雲表嶢櫨臨大虛高軒  
啟朱扉迴望暢八隅西瞻岷山領嵯峨似荆巫蹲鴟蔽地  
生原隰殖嘉蔬雖遇堯湯世民食恆有餘鬱鬱少城中岷  
岷百族居街術紛紛綺錯高薨夾長衢借問楊子宅想見長  
卿廬程卓累千金驕侈擬五侯門有連騎客翠帶要吳鉤  
鼎食隨時進百和妙且殊披林采秋橘臨江釣春魚黑子  
過龍醢果饌踰蟹蟻芳茶冠六清溢味播九區人生苟安  
樂茲土聊可娛

招隱詩

出處雖殊塗居然有輕易山林有悔恡人間實多累鷓鴣  
翔窮冥蒲且不能視鶴鷺遵臯渚數爲殢所繫隱顯雖在  
心彼我共一地不見巫山火芝艾豈相離去來捐時俗超  
然辭世僞得意在韭中安事愚與智

七哀詩二首

北芒何纍纍高陵有四五借問誰家墳皆云漢世主恭文  
遙相望原陵鬱膺膺季世喪亂起賊盜如豺虎毀壤過一  
塚便房啟幽戶珠柙離玉體珍寶見剽虜園寢化爲墟周  
墉無遺堵蒙龍荆棘生蹊逕登童豎狐兔窟其中蕪穢不  
復掃頽隴並墾發萌隸營農圃昔爲萬乘君今爲邱中土

感彼雍門言悽愴哀今古

秋風吐商氣蕭瑟掃前林  
陽鳥收和響寒蟬無餘音  
白露中夜結木落柯條森  
朱光馳北陸浮景忽西沈  
顧望無所見唯覩松柏陰  
肅肅高桐枝翩翩棲孤禽  
仰聽離鴻鳴俯聞蜻蛚吟  
哀人易感傷觸物增悲心  
邱隴日已遠纏綿彌思深  
髮來令髮白誰云愁可任  
裴徊向長風淚下沾衣襟

張協

詠史

昔在西京時朝野多歡娛  
藹藹東都門羣公祖二疏  
朱軒曜金城供帳臨長衢  
達人知止足遺榮忽如無  
抽簪解朝



衣散髮歸海隅行人爲隕涕賢哉此大夫揮金樂當年歲  
暮不留儲願謂四座賓多財爲累愚清風激萬代名與天  
壤俱咄此蟬冕客君紳宜見書

雜詩十首

秋夜涼風起清氣蕩暄濁蜻蛚吟階下飛蛾拂明燭君子  
從遠役佳人守熒獨離居幾何時鑽燧忽改木房櫳無行  
跡庭草萋以綠青苔依空牆蜘蛛網四屋感物多所懷沈  
憂結心曲

大火流坤維白日馳西陸浮陽映翠林迴飈扇綠竹飛雨  
灑朝蘭輕露棲叢菊龍蟄暄氣凝天高萬物肅弱條不重

結芳蕤豈再馥人生瀛海內忽如鳥過目川上之歎逝前  
修以自勸

金風扇素節丹霞啟陰期騰雲似涌煙密雨如散絲寒花  
發黃采秋草含綠滋閒居玩萬物離羣戀所思案無蕭氏  
牘庭無賁公綦高尚遺王侯道積自成基至人不嬰物餘  
風足染時

朝霞迎白日丹氣臨暘谷翳翳結繁雲森森散雨足輕風  
催勁草凝霜竦高木密葉日夜疏叢林森如束疇昔歎時  
遲晚節悲年促歲暮懷百憂將從季主卜

昔我資章甫聊以適諸越行行入幽荒歐駱從祝髮窮年

非所用此貨將安設瓴甌夸璵璠魚目笑明月不見郢中歌能否居然別陽春無和者巴人皆下節流俗多昏迷此理誰能察

朝登魯陽關狹路峭且深流澗萬餘丈圍木數千尋咆虎響窮山鳴鶴聒空林淒風爲我嘯百籟坐自吟感物多思情在險易常心竭來戒不虞挺轡越飛岑王陽驅九折周文走岑崆經阻貴勿遲此理著來今

此鄉非吾地此郭非吾城羈旅無定心翩翩如懸旌出覩軍馬陣入聞鞞鼓聲常懼羽檄飛神武一朝征長鋏鳴鞞中烽火列邊亭捨我衡門衣更被縵胡纓疇昔懷微志惟

幕竊所經何必操干戈堂上有奇兵折衝樽俎間制勝在  
兩楹巧遲不足稱拙速乃垂名

述職投邊城羈束戎旅間下車如昨日望舒四五圓借問  
此何時胡蝶飛南園流波戀舊浦行雲思故山閩越衣文  
虵胡馬願度燕風土安所習由來有固然

結宇窮岡曲耦耕幽藪陰荒庭寂以間幽岫峭且深淒風  
起東谷有滄興南岑雖無箕畢期膚寸自成霖澤雉登壘  
雝寒猿擁條吟溪壑無人跡荒楚鬱蕭森投耒循岸垂時  
聞樵採音重基可擬志迴淵可比心養真尙無爲道勝貴  
陸沈游思竹素園寄辭翰墨林

黑蜃躍重淵商羊舞野庭飛廉應南箕豐隆迎號屏雲根  
臨八極雨足灑四溟霖漑過二旬散漫亞九齡階下伏泉  
涌堂上水衣生洪潦浩方割人懷昏墊情沈液漱陳根綠  
葉腐秋莖里無曲突煙路無行輪聲環堵自頽毀垣閭不  
隱形尺燼重尋桂紅粒貴瑤瓊君子守固窮在約不爽貞  
雖榮田方贈慙爲溝壑名取志於陵子比足黔婁生

王讚

雜詩

朔風動秋草邊馬有歸心胡甯久分析靡靡忽至今王事  
離我志殊隔過商參昔往鷓鴣鳴今來蟋蟀吟人情懷舊

鄉客鳥思故林師涓久不奏誰能宣我心

孫楚

征西官屬送於陟陽侯作詩

晨風飄岐路零雨被秋草傾城遠追送餞我千里道三命  
皆有極咄嗟安可保莫大於殤子彭聃猶爲天吉凶如糾  
纏憂喜相紛繞天地爲我鱸萬物一何小達人垂大觀誠  
此苦不早乖離卽長衢惆悵盈懷抱孰能察其心鑿之以  
蒼昊齊契在今朝守之與偕老

之馮翊祖道詩

舉翮撫三秦抗我千里目念當隔山河執觴懷慘毒

關

石崇

王明君辭

並序

王明君者本是王昭君以觸文帝諱改之匈奴盛請婚於漢元帝以後宮良家子昭君配焉昔公主嫁烏孫令琵琶馬上作樂以慰其道路之思其送昭君亦必爾也其造新曲多哀怨之聲故敘之於紙云爾

我本漢家子將適單于庭辭訣未及終前驅已抗旌僕御涕流離轅馬悲且鳴哀鬱傷五內泣淚沾朱纓行行日已遠遂造匈奴城延我於穹廬加我闕氏名殊類非所安雖貴非所榮父子見陵辱對之慙且驚般身良不易默默以

苟生苟生亦何聊積思常憤盈願假飛鴻翼乘之以遐征  
飛鴻不我顧伫立以屏營昔爲匣中玉今爲糞上英朝華  
不足歡甘與秋草并傳語後世人遠嫁難爲情

贈棗腆

久官無成績棲遲於徐方寂寂守空城悠悠思故鄉恂恂  
二三賢身遠屈龍光攜手沂泗間遂登舞雩堂文藻譬春  
華談話猶蘭芳消憂以觴醴娛耳以名倡博奕逞妙思弓  
矢威邊疆

荅曹嘉詩

昔常接羽儀俱游青雲中敦道訓胄子孺化渙以融同聲



無異響故使恩愛隆豈惟敦初好款分在令終孔子陋九  
夷老氏適西戎逍遙滄海隅可以保玉躬世事非所務周  
公不足夢玄寂令神王是以守至沖

石崇婢翔風

怨詩

春華誰不美卒傷秋落時突煙還自低鄙退豈所期桂芳  
往自蠹失愛在蛾眉坐見芳時歇憔悴空自嗤

曹攄

思友人詩

密雲翳陽景霖潦淹庭除嚴霜彫翠草寒風振纖枯凜凜

八代詩選  
三十一  
天氣清落落卉木疏感時歌蟋蟀思賢詠白駒情隨玄陰  
滯心與迴飈俱思心何所懷懷我歐陽子精義測神奧清  
機發妙理自我別旬朔微言絕於耳褰裳不足難清揚未  
可俟延首出階檐佇立增想似

郭泰機

答傅咸

嗷嗷白素絲織爲寒女衣寒女雖妙巧不得秉杼機天寒  
知運速況復雁南飛衣工秉刀尺棄我忽若遣人不取諸  
身世事焉所希況復已朝餐曷由知我饑

劉琨

重贈盧諶

握中有玄璧本自荆山璆惟彼太公望昔在渭濱叟鄧生  
何感激千里來相求白登幸曲逆鴻門賴留侯重耳任五  
賢小白相射鉤苟能隆二伯安問黨與讐中夜撫枕歎想  
與數子游吾衰久矣夫何其不夢周雖云聖達節知命故  
不憂宣尼悲獲麟西狩涕孔丘功業未及建夕陽忽西流  
時哉不我與去乎若雲浮朱實隕勁風繁英落素秋狹路  
傾華蓋駭駟摧雙輅何意百鍊剛化爲繞指柔

扶風歌

朝發廣莫門暮宿丹水山左手彎繁弱右手揮龍淵顧瞻

望宮闕俯仰御飛軒據鞍長歎息淚下如流泉繫馬長松下發鞍高岳頭烈烈悲風起冷冷澗水流揮手長相謝哽咽不能言浮雲爲我結歸鳥爲我旋去家日已遠安知存與亡慷慨窮林中抱膝獨摧藏麋鹿遊我前猿猴戲我側資糧既乏盡薇蕨安可食攬轡命徒侶吟嘯絕巖中君子道微矣夫子故有窮惟昔李騫期寄在匈奴庭忠信反獲罪漢武不見明我欲竟此曲此曲悲且長棄置勿重陳重陳令心傷

盧諶

贈崔溫

逍遙步城隅暇日聊游豫北眺沙漠垂南望舊京路平陸  
引長流岡巒挺茂樹中原厲迅飈山阿起雲霧游子恆悲  
懷舉目增永慕良儔不獲偕舒情將焉訴遠念賢士風近  
存往古務朔鄙多俠氣豈唯地所固李牧鎮邊城荒夷懷  
南懼趙奢正疆場秦人折北慮羈旅及寬政委質與時遇  
恨以駑蹇姿徒煩非子御亦既弛負擔忝位宰黔庶苟云  
免罪戾何暇收民譽倪寬以殿黜終乃最眾賦何武不赫  
赫遺愛常在去古人非所希短弱自有素何以敷斯辭惟  
以二子故

答魏子悌

崇臺非一榦珍裘非一腋多士成大業羣賢濟弘績遇蒙  
時來會聊齊朝彥跡顧此腹背羽愧彼排虛翮寄身蔭四  
嶽託好憑三益傾蓋雖終朝大分邁疇昔在危每同險處  
安不異易俱涉晉昌艱共更飛狐厄恩由契闊生義隨周  
旋積豈謂鄉曲譽謬充本州役乖離令我感悲欣使情惕  
理以精神通匪曰形骸隔妙詩申篤好清義賁幽蹟恨無  
隨侯珠以酬荆文璧

覽古詩

趙氏有和璧天下無不傳秦人來求市厥價徒空言與之  
將見賣不與恐致患簡才備行李圖令國命全蘭生在下

位繆子稱其賢奉辭馳出境伏軾徑入關秦王御殿坐趙  
使擁節前揮袂睨金柱身玉要俱捐連城旣僞往荆玉亦  
眞還爰在澠池會二主克交歡昭襄欲負力相如折其端  
皆血下霑襟怒髮上衝冠西缶終雙擊東瑟不隻彈捨生  
豈不易處死誠獨難稜威章臺顛彊禦亦不干屈節邯鄲  
中俛首忍回軒廉公何爲者負荆謝厥讐智勇冠當世弛  
張使我歎

時興詩

疊疊圓象運悠悠方儀廓忽忽歲云暮游原采蕭藿北踰  
芒與河南臨伊與洛凝霜霑蔓草悲風振林薄撼撼芳果

零樂樂芬華落下泉激冽清曠野增遼索登高眺遐荒極  
望無崖寧形變隨時化神感因物作澹乎至人心恬然存  
玄漠

曹攄

感舊詩

富貴他人合貧賤親戚離廉藺門易軌田竇相奪移晨風  
集茂林棲鳥去枯枝今我唯困蒙羣士所背馳鄉人敦懿  
義濟濟蔭光儀對賓頌有客舉觴詠露斯臨樂何所歎素  
絲與路岐

贈石崇



涓涓谷中泉鬱鬱岩下林泄泄羣翟飛咬咬春鳥吟野次  
何索寞薄暮愁人心三軍望衡蓋歎息有餘音臨着忘肉  
味對酒不能斟人言重離別斯情效于今

歐陽建

臨終詩

伯陽適西戎孔子欲居蠻苟懷四方志所在可游盤況乃  
遭屯蹇顛沛遇災患古人達機兆策馬游近關咨余冲且  
暗抱責守微官潛圖密已構成此禍福端恢恢六合閒四  
海一何寬天網布絃綱投足不獲安松柏隆冬悴然後知  
歲寒不涉太行險誰知斯路難真僞因事顯人情難豫觀

窮達有定分慷慨復何歎上負慈母恩痛酷摧心肝下顧  
所憐女惻惻心中酸二子棄若遺念皆邁凶殘不惜一身  
死惟此如循環執紙五情塞揮筆涕洟瀾

稽紹

贈石季倫

人生稟五常中和爲至德嗜欲雖不同伐生所不識仁者  
安其身不爲外物惑事故誠多端未若酒之賊內以損性  
命煩辭傷軌則屢飲致疲怠清和自否塞陽豎敗楚軍長  
夜傾宗國詩書著明戒量體節飲食遠希彭聃壽虛心處  
冲默茹芝味醴泉何爲昏酒色

閻邱冲

招隱詩

大道曠且夷  
蹊路安足尋  
經世有險易  
隱顯自存心  
嗟哉巖岫士  
歸來從所欽

靜歎亦何念  
悲此妙齡逝  
在世無干月  
命如秋葉蒂  
蘭生蓬芭間  
榮曜常幽翳

楊方

合歡詩二首

虎嘯谷風起  
龍躍景雲浮  
同聲好相應  
同氣自相求  
我情與子親  
譬如影追軀  
食共並根穗  
飲共連理杯  
衣共雙絲

絹寢共無縫綢居願接膝坐行願攜手趨子靜我不動子  
游我不留齊彼同心鳥譬此比目魚情至斷金石膠漆未  
爲牢但願常無別合形作一軀生爲併身物死爲同棺灰  
秦氏自言至我情不可儔

磁石引長鍼陽燧下炎煙宮商聲相和心同自相親我情  
與子合亦如影追身寢共織成被絮共同功綿暑搖比翼  
扇寒坐併肩檀子笑我必哂子戚我無歡來與子共跡去  
與子同塵齊彼蛩蛩獸舉動不相捐唯願長無別合形作  
一身分生有同室好死成併棺民徐氏自言至我情不可陳

雜詩三首

獨坐空室中愁有數千端悲響答愁歎哀涕應苦言彷徨  
四顧望白日入西山不覩佳人來但見飛鳥還飛鳥亦何  
樂夕宿自作羣

郭璞

游仙詩

京華游俠窟山林隱遯棲朱門何足榮未若託蓬萊臨源  
挹清波陵岡掇丹雘靈谿可潛盤安事登雲梯漆園有傲  
吏萊氏有逸妻進則保龍見退爲觸藩羝高蹈風塵外長  
揖謝夷齊

青溪千餘仞中有一道士雲生梁棟間風出窗戶裏借問

此何誰云是鬼谷子翹跡企潁陽臨河思洗耳聞闔西南  
來潛波渙鱗起靈妃顧我笑粲然啟玉齒蹇修時不存要  
之將誰使

翡翠戲蘭若容色更相鮮綠蘿結高林蒙籠蓋一山中有  
冥寂士靜嘯撫清絃放情凌霄外嚼蘂挹飛泉赤松臨上  
游駕鴻乘紫煙左挹浮邱袖右拍洪崖肩借問蜉蝣輩甯  
知龜鶴年

六龍安可頓運流有代謝時變感人思已秋復願夏淮海  
變微禽吾生獨不化雖欲騰丹谿雲螭非我駕愧無魯陽  
德迴日向三舍臨川哀年邁撫心獨悲吒

逸翮思拂霄，迅足羨遠游。清源無增瀾，安得運吞舟。珪璋雖特達，明月難淹留。投潛穎，怨青陽。陵蒼哀，素秋悲。來憫丹心零，淚綠纓流。

雜縣寓魯門，風暖將爲災。吞舟涌海底，高浪駕蓬萊。神仙排雲出，但見金銀臺。陵陽挹丹溜，容成揮玉杯。姮娥揚妙音，洪崖頷其頤。升降隨長煙，飄飄戲九垓。奇齡邁五龍，千歲方嬰孩。燕昭無靈氣，漢武非仙才。

晦朔如循環，月盈已復魄。蓐收清西陸，朱羲將由白。寒露拂陵茗，女蘿辭松柏。薜榮不終朝，蜉蝣豈見夕。圓邱有奇草，鐘山出靈液。王孫列八珍，安期鍊五石。長揖當塗人，去

來山林客

陽谷吐靈曜扶桑森千丈朱霞升東山朝日何晃朗迴風  
流曲櫺幽室發逸響悠然心永懷眇爾自遐想仰思舉雲  
翼延首矯玉掌嘯傲遺世羅縱情在獨往明道雖若昧其  
中有妙象希賢宜勵德羨魚當結網

採藥游名山將以救年頽呼吸玉滋液妙氣盈胸懷登仙  
撫龍駟迅駕乘奔雷鱗裳逐電曜雲蓋隨風迴手頓羲和  
轡足蹈閭闔開東海猶蹄涔崑崙若蟻堆遐邈冥茫中俯  
視令人哀

璇臺冠崑嶺西海濱招搖瓊林籠藻映碧樹疏英翹丹泉



漂朱沫黑水鼓玄濤尋仙萬餘日今乃見子喬振髮歸翠  
霞解褐被絳綃總轡臨少廣盤虬舞雲輶永偕荷鄉侶千  
齡其逍遙

飛黃銜長轡翼翼回輕輪俯涉淥水澗仰過九層山修塗  
曲且險秋草生兩邊黃華如杏金白花如散銀青敷羅翠  
采絳葩象赤雲爰有承露枝紫雲合素芬扶疏垂清藻布  
翹芳且鮮目爲艷采回心爲奇色旋撫心悼孤客俯仰還  
自憐踟躕向壁歎攬筆作此文

南鄰有奇樹承春挺素華豐翹被長條綠葉蔽朱柯因風  
吐德音芳氣入紫霞我心羨此木願徙著予家夕得游其

下朝得弄其葩爾根深且堅予宅淺且洿移植良無期歎  
息將如何

王鑒

七夕觀織女

牽牛悲殊館織女悼離家一稔期一宵此期良可嘉赫奕  
立門開飛閣鬱嵯峨隱隱驅千乘闐闐越星河六龍奮瑤  
轡文螭負瓊車火丹秉瑰燭素女執瓊華絳旗若吐電朱  
蓋如振霞雲韶何嘈噉虛鼓鳴相和停軒佇高盼眷予在  
宸我澤因芳露沾恩附蘭風加明發相從游翩翩鸞鷲羅  
同游不同觀念子憂怨多敬因三祝末以爾屬星娥

王羲之

蘭亭集詩

並序

永和九年歲在癸丑暮春之初會於會稽山陰之蘭亭  
修禊事也羣賢畢至少長咸集此地有崇山峻嶺茂林  
修竹又有清流激湍映帶左右引以爲流觴曲水列坐  
其次雖無絲竹絃管之盛一觴一詠亦足以暢敘幽情  
是日也天朗氣清惠風和暢仰觀宇宙之大俯察品類  
之盛所以游目騁懷足以極視聽之娛信可樂也夫人  
之相與俯仰一世或取諸懷抱悟言一室之內或因寄  
所託放浪形骸之外雖趨舍萬殊靜躁不同當其欣於

所遇暫得於已快然自足不知老之將至及其所之既倦情隨事遷感慨係之矣向之所欣俛仰之間以爲陳跡猶不能不以之興懷况修短隨化終期於盡古人云死生亦大矣豈不痛哉每攬昔人興感之由若合一契未嘗不臨文嗟悼不能喻之於懷固知一死生爲虛誕齊彭殤爲妄作後之視今亦猶今之視昔悲夫故列敘時人錄其所述雖世殊事異所以興懷其致一也後之攬者亦將有感於斯文

仰視碧天際俯瞰淥水濱寥閭無涯觀寓目理自陳大矣造化工萬殊莫不均羣賴雖參差適我無非新

謝安

蘭亭集詩

相與欣佳節，率爾同褰裳。  
薄雲羅景物，微風翼輕航。  
醅醪陶丹府，兀若游羲唐。  
萬殊混一理，安復覺彭殤。

孫統

蘭亭集詩

地主觀山水，仰尋幽人踪。  
回沼激中逵，疏竹間修桐。  
因流轉輕觴，冷風颺落松。  
時禽吟長澗，萬籟吹連峯。

曹茂之

蘭亭集詩

時來誰不懷寄散山林間尙想方外賓迢迢有餘間

桓偉

蘭亭集詩

至人雖無懷應物貴有尙宣尼遨沂津蕭然心神王數子  
各言志曾生發清唱今我欣斯游愜情亦暫暢

魏滂

蘭亭集詩

三春陶和氣萬物齊一歡明后欣時豐駕言暎清瀾疊疊  
德音暢蕭蕭遺世難望巖愧脫屣臨川謝揭竿

孫綽

蘭亭集詩 後序

古人以水喻性有旨哉非所以澹之則清滄之則濁耶  
故振轡於朝市則充屈之心生閒步於林野則寥落之  
意興仰瞻羲唐邈然遠矣近詠臺閣顧探增懷聊於曖  
昧之中期乎瑩拂之道暮春之始禊於南澗之濱高嶺  
千尋長湖萬頃乃藉芳草鑑清流覽卉物觀魚鳥具類  
同榮資生成暢於是和以醕醪齊以達觀快然兀矣焉  
復覺鵬鷗之二物哉耀靈縱轡急景西邁樂與時去悲  
亦系之往復推移新故相換今日之跡明復陳矣原詩  
人之致興諒歌詠之有由文多不載大略如此所賦詩

亦裁而綴之如前四言五言焉

流風拂枉渚停雲蔭九皋鶯語吟修竹游鱗戲瀾濤攜筆  
落雲藻微言剖纖毫時珍豈不甘忘味在閩韶

秋日

蕭瑟仲秋日颺暎風雲高山居感時變遠客興長謠疏林  
積涼風虛岫結凝霄湛露灑庭林密葉辭榮條撫菌悲先  
落攀松羨後凋垂綸在林野交情遠市朝澹然古懷心濠  
上豈伊遙

江道

詠秋



祝融解炎轡，葍收起涼駕。高風催節變，凝露督物化。長林  
悲素秋，茂草思朱夏。鳴雁薄雲嶺，蟋蟀吟深榭。寒蟬向夕  
號，驚飈激中夜。感物增人懷，悽然無欣暇。

庾闡

衡山

北眺衡山首，南睨五嶺末。寂坐挹虛恬，運目情四豁。翔虬  
凌九霄，陸鱗困濤沫。未體江湖悠，安識南溟闊。

觀石鼓

命駕觀奇逸，經鶩造靈山。朝濟清溪岸，夕憇五龍泉。鳴石  
含潛響，雷駭震九天。妙化非不有，莫知神自然。翔霄拂翠

嶺綠澗激巖間手澡春泉潔目翫陽葩鮮

採藥詩

採藥靈山標結駕登九嶷懸巖溜石髓芳谷挺丹芝泠泠  
雲珠落濯濯石蜜滋鮮景染冰顏妙氣翼冥期霞光煥蘿  
靡虹景照參差椿壽自有極槿花何用疑

袁宏

詠史二首

周昌梗槩臣辭達不爲訥汲黯社稷器棟梁天表骨陸賈  
厭解紛時與酒檮杌婉轉將相門一言和平勃趨舍各有  
之俱令道不沒

無名困蠖蟻有名世所疑中庸難爲體狂狷不及時楊惲  
非忌貴知及有餘辭躬耕南山下燕穢不遑治趙瑟奏哀  
音秦聲歌新詩吐音非凡唱負此欲何之

李充

嘲友人

同好齊歡愛纏綿一何深子旣識我情我亦知子心燕婉  
歷年歲和樂如瑟琴良辰不我俱中闊似商參爾隔北山  
陽我分南川陰嘉會罔克從積思安可任目想妍麗姿耳  
存清媚音修畫興永念遙夜獨悲吟逝將尋行役言別涕  
沾襟願爾降玉趾一顧重千金

曹毗

詠冬

絲邈冬夕永凜厲寒氣升離葉向晨落長風振條興夜靜  
輕響起天清月暉澄寒冰盈渠結素霜竟欄凝今載忽已  
暮來紀奄復仍

夜聽擣衣

寒興御紈素佳人理衣衾冬夜清且永皓月照堂陰纖手  
疊輕素朗杵叩鳴砧清風流繁節迴颺灑微吟嗟此嘉運  
速悼彼幽滯心二物感余懷豈但聲與音

習鑿齒

燈

煌煌閒夜燈脩脩樹間亮燈隨風燁燁風與燈升降

陶淵明

游斜川并序

辛丑歲正月五日天氣澄和風物閒美與二三隣曲同  
游斜川臨長流望曾城魴鯉躍鱗於將夕水鷗乘和以  
翻飛彼南阜耆名實舊矣不復乃爲嗟歎若夫曾城旁  
無依接獨秀中舉遙望靈山有愛嘉名欣對不足率爾  
賦詩悲日月之遂往悼吾年之不留各疏年紀鄉里以  
記其時日

開歲條五日吾生行歸休念之動中懷及辰爲茲游氣和  
天惟澄班坐依遠流弱湍馳文魴問谷矯鳴鷗迴澤散游  
目緬然睇曾邱雖微九重秀顧瞻無匹儔提壺接賓侶引  
滿更獻酬未知從今去當復如此不中觴縱遙情忘彼千  
載憂且極今朝樂明日非所求

示周續之祖企謝景夷三郎

負疴頽簷下終日無一欣藥石有時閒念我意中人相去  
不尋常道路邈何因周生述孔業祖謝響然臻道喪向千  
載今朝復斯聞馬隊非講肆校書亦已勤老夫有所愛思  
與爾爲隣願言誨諸子從我潁水濱

答龐參軍 并序

三復來貺欲罷不能自爾隣曲冬春再交款然良對忽  
成舊游俗諺云數面成親舊況情過此者乎人事好乖  
便當語離楊公所歎豈惟常悲吾抱疾多年不復爲文  
本旣不豐復老病繼之輒依周孔往復之義且爲別後  
相思之資

相知何必舊傾蓋定前言有客賞我趣每每願林園談諧  
無俗調所說聖人篇或有數斗酒閒飲自懽然我竇幽居  
士無復東西緣物新人惟舊弱毫多所宣情通萬里外形  
跡滯江山君其愛體素來會在何年

五月旦作和戴主簿

虛舟縱逸棹回復遂無窮發歲始俛仰星紀奄將中南窗  
罕悴物北林榮且豐神淵寫時雨晨色奏景風旣來孰不  
去人理固有終居常待其盡曲肱豈傷冲遷化或夷險肆  
志無窳隆卽事如已高何必升華嵩

和劉柴桑

山澤久見招胡事乃躊躇直爲親舊故未忍言索居良辰  
入奇懷挈杖還西廬荒塗無歸人時時見廢墟茅茨已就  
治新疇復應畚谷風轉淒薄春醪解饑劬弱女雖非男慰  
情良勝無栖栖世中事歲月其相疏耕織稱其用過此奚



所須去去百年外身名同翳如

酬劉柴桑

窮居寡人用時忘四運周櫛庭多落葉慨然知己秋新葵  
鬱北牖嘉穠養南疇今我不爲樂知有來歲不命室攜童  
弱良日登遠游

和郭主簿二首

藹藹堂前林中夏貯清陰凱風因時來回飈開我襟息交  
游閒業臥起弄書琴園蔬有餘滋舊穀猶儲今榮已良有  
極過足非所欽春秫作美酒酒熟吾自斟弱子戲我側學  
語未成音此事眞復樂聊用忘華簪遙遙望白雲懷古一

何深

和澤周二春清涼素秋節露凝無游氛天高肅景激陵岑  
聳逸峯遙瞻皆奇絕芳菊開林耀青松冠巖列懷此貞秀  
姿卓爲霜下傑銜觴念幽人千載撫爾訣檢素不獲展厭  
厭竟良月

贈羊長史

并序

左軍羊長史銜使秦川作此與之

愚生三季後慨然念黃虞得知千載外正賴古人書賢聖  
留餘跡事事在中都豈忘游心目關河不可踰九域甫已  
一逝將理舟輿聞君當先邁負疴不獲俱路若經商山爲

我少躊躇多謝綺與角精爽今何如紫芝誰復採深谷久  
應蕪駟馬無貫患貧賤有交娛清謠結心曲人乖運見疏  
擁懷累代下言盡意不舒

始作鎮軍參軍經曲阿作

弱齡寄事外委懷在琴書被褐欣自得屢空常宴如時來  
苟冥會婉變憇通衢投策命晨裝暫與田園疏眇眇孤舟  
逝綿綿歸思紆我行豈不遙登陟千里餘目倦川塗異心  
念山澤居望雲慙高鳥臨水愧游魚真想初在襟誰謂形  
跡拘聊且憑化遷終返班生廬

庚子歲五月中從都還阻風於規林二首

行行循歸路計日望舊居一欣待溫顏再喜見友于鼓棹  
路崎曲指景限西隅江山豈不險歸子念前途凱風負我  
心戢柁守窮湖高莽眇無界夏木獨森疏誰言客舟遠近  
瞻百里餘延目識南嶺空歎將焉如

自古歎行役我今始知之山川一何曠巽坎難與期崩浪  
聒天響長風無息時久游戀所生如何淹在茲靜念園林  
好人間良可辭當年詎有幾縱心復何疑

辛丑歲七月赴假還江陵夜行塗口作

閒居三十載遂與塵事冥詩書敦宿好林園無俗情如何  
捨此去遙遙至南荆叩柁新秋月臨流別友生涼風起將

夕夜景湛虛明昭昭天宇闊  
鼎鼎川上平懷役不遑寐中  
宵尙孤征商歌非吾事依依  
在耦耕投冠旋舊墟不爲好  
爵榮養真衡茅下庶以善自名

歲暮和張常侍

市朝悽舊人驟驥感悲泉  
明旦非今日歲暮余何言  
素顏斂光潤白髮一已繁  
闕哉秦穆談旅力豈未愆  
向夕長風起寒雲沒西山  
厲厲氣遂嚴紛紛飛鳥還  
民生鮮常在矧伊愁苦纏  
屢闕清酤至無以樂當年  
窮通靡攸慮顛頓由化遷  
撫己有深懷履運增慨然

和胡西曹示顧賊曹

蕤賓五月中清朝起南颺不駛亦不遲飄飄吹我衣重雲  
蔽白日間雨紛微微流目視西園暄暄榮紫葵于今甚可  
愛如何當復衰感物願及時每恨靡所揮悠悠待秋稼寥  
落將賒遲逸想不可淹猖狂獨長悲

癸卯十二月中作與從弟敬遠

寢跡衡門下邈與世相絕顧盼莫誰知荆扉晝常閉淒淒  
歲暮風翳翳經日雪傾耳無希聲在目皓已潔勁氣侵襟  
袖簞瓢謝屢設蕭索空宇中了無一可悅歷覽千載書時  
時見遺烈高操非所攀深得固窮節平津苟不由栖遲詎  
爲拙寄意一言外茲契誰能別

與殷晉安別

並序

殷先作晉安南府長史掾因居潯陽後作太尉參軍移  
家東下作此以贈

游好非久長一遇盡殷勤信宿酬清話益復知爲親去歲  
家南里薄作少時鄰負杖肆游從淹留忘宵晨語默自殊  
勢亦知當乖分未謂事已及興言在茲春飄飄西來風悠  
悠東去雲山川千里外言笑難爲因才華不隱世江湖多  
賤貧脫有經過便念來存故人

於王撫軍座送客

秋日淒且厲百卉具已腓爰以履霜節登高餞將歸寒氣

八代詩選  
五  
冒山澤游雲倏無依洲渚思綿逸風水互乖違瞻夕欲良  
讌離言聿云悲晨鳥暮來還懸車斂餘暉逝止判殊路旋  
駕悵遲遲目送回舟遠情隨萬化遺

乙巳歲三月爲建威參軍使都經錢溪

我不踐斯境歲月好已積晨夕看山川事事悉如昔微雨  
洗高林清飈矯雲翮眷彼品物存義風都未隔伊余何爲  
者勉勵從茲役一形似有制素襟不可易園田日夢想安  
得久離析終懷在歸舟諒哉宜霜柏

詠二疏

大象轉四時功成者自去借問衰周來幾人得其趣游目



漢庭中二疏復此舉高嘯返舊居長揖儲君傳餞送傾皇  
城華軒盈道路離別情所悲餘榮何足顧事勝感行人賢  
哉豈常譽厭厭閭里歡所營非近務促席延故老揮觴道  
平素問金終寄心清言曉未晤放意樂餘年遑恤身後慮  
誰云其人亡久而道彌著

詠三良

彈冠乘通津但懼時我遺服勤盡歲月常恐功愈微忠情  
謬獲露遂爲君所私出則陪文輿入必侍丹帷箴規向已  
從計議初無虧一朝長逝後願言同此歸厚恩固難忘君  
命安可違臨穴罔惟疑投義志攸希荆棘籠高墳黃鳥聲

正悲良人不可贖  
泣然沾我衣

詠荆軻

燕丹善養士志在報強嬴  
招集百夫良歲暮得荆卿  
君子死知已提劍出燕京  
素驥鳴廣陌慷慨送我行  
雄髮指危冠猛氣充長纓  
飲饑易水上四座列羣英  
漸離擊悲筑宋意唱高聲  
蕭蕭哀風逝淡淡寒波生  
商音更流涕羽奏壯士驚  
心知去不歸且有後世名  
登車何時顧飛蓋入秦庭  
凌厲越萬里逶迤過干城  
圖窮事自至豪主正怔營  
惜哉劍術疏奇功遂不成  
其人雖已沒千載有餘情

桃花源詩

并記

晉太元中武陵人捕魚爲業緣溪行忘路之遠近忽逢  
桃花林夾岸數百步中無雜樹芳草鮮美落英繽紛漁  
人甚異之復前行欲窮其林林盡水源便得一山山有  
小口髣髴若有光便捨船從口入初極狹纔通人復行  
數十步豁然開朗土地平曠屋舍儼然有良田美池桑  
竹之屬阡陌交通雞犬相聞其中往來種作男女衣著  
悉如外人黃髮垂髻並怡然自樂見漁人乃大驚問所  
從來具答之便要還家設酒殺雞作食村中聞有此人  
咸來問訊自云先世避秦時亂率妻子邑人來此絕境  
不復出焉遂與外人間隔問今是何世乃不知有漢無

論魏晉此人一一爲具言所聞皆歎惋餘人各復延至其家皆出酒食停數日辭去此中人語云不足爲外人道也旣出得其船便扶向路處處誌之及郡下詣太守說如此太守卽遣人隨其往尋向所誌遂迷不復得路南陽劉子驥高尙士也聞之欣然親往未果尋病終後遂無問津者

嬴氏亂天紀賢者避其世黃綺之商山伊人亦云逝往跡浸復湮來逕遂蕪廢相命肆農耕日入從所憩桑竹垂餘蔭菽稷隨時藝春蠶收長絲秋熟靡王稅荒路曖交通雞犬互鳴吠俎豆猶古法衣裳無新製童孺縱行歌斑白歡

游詣草榮識節和木衰知風厲雖無紀歷誌四時自成歲  
怡然有餘樂于何勞智慧奇蹤隱五百一朝啟神界清薄  
既異源旋復還幽蔽借問游方士焉測塵囂外願言躡輕  
風高舉尋吾契

九日閒居

並序

余閒居愛重九之名秋菊盈園而持醪靡由空服九華  
寄懷於言

世短意常多斯人樂久生日月依辰至舉俗愛其名露淒  
暄風息氣澈天象明往燕無遺影來雁有餘聲酒能祛百  
慮菊爲制頽齡如何蓬廬士空視時運傾塵爵恥虛囂寒

華徒自榮斂襟獨間謠緬焉起深情棲遲固多娛淹留豈  
無成

八代詩選第六